

Uvodna izjava Henry L. Clarke-a, Supervizora za Brcko, na konferenciji za novinare u OHR-Sjever

Zadovoljstvo mi je da objavim da Ured za privatizaciju u Brčko Distriktu otkriva da će početkom oktobra ponuditi prva javna preduzeća za privatizaciju. U nedostatku sporazuma između entiteta i Brčko Distrikta o upotrebi vaučera i certifikata, Skupština Brčkog nije bila u mogućnosti da usvoji Zakon o privatizaciji. Već godinama je očigledno da su privatizacija i nova ulaganja od izuzetne važnosti za revitalizaciju ovih preduzeća. Ja sam odlučan da pokrenem ovaj proces. Privatizovaćemo do 67% vrijednosti državnog kapitala u svakom preduzeću, a preostali dio kapitala će ostati imovina Distrikta dok ne budemo imali sporazum ili zakon koji obrađuje način upotrebe vaučera i certifikata. Markovićeve dionice koje posjeduju građani će se priznati i postać dio kapitala novonastalih privatizovanih preduzeća. U tom smislu potpisao sam Nalog supervizora i kopije istog će vam biti dostupne.

Ovim Nalogom ne zatvaram vrata upotrebi vaučera ili certifikata, ili saradnji sa entitetima. Naprotiv, zajedno sa Vladom Brčkog otvaramo vrata stranim investicijama i tehnologiji, kao i domaćim investitorima i njihovim resursima. Skupština Distrikta je usvojila i siguran sam da će nastaviti da usvaja zakone kojima se ohrabruju investicije i inovacije. Brčko postaje odlično mjesto za biznis, a mi ćemo naporno raditi na promociji mogućnosti koje nudimo za investicije, u što je moguće širem regionu.

Sada kad je dugotrajan i težak proces zapošljavanja u upravi Brčko Distrikta gotovo završen, postalo je jasno koji će bivši radnici entiteta, kantona i opština ostati bez posla. Njihove plate će biti isplaćivane zaključno sa 31. oktobrom 2001. U novembru i decembru će primiti otpremnine od Vlade Brčko Distrikta. Poslao sam pismo u Federaciju i Republiku Srpsku, u kojem tražim od njih da započnu sa plaćanjem otpremnina za svoje bivše radnike od 1. januara 2002., u skladu sa sporazumima potpisanim u oktobru prošle godine. Poslao sam im i preliminarne liste sa imenima njihovih bivših radnika, i vjerujem da ćinimo sve što je moguće kako bismo ovu tešku tranziciju izvršili na odgovarajući način.

U Brčkom još uvijek ima preko 5000 neriješenih zahtjeva za povratak upotrebljive imovine. Samo je oko 24 % svih zahtjeva riješeno. Moramo raditi bolje. Zajedno sa OSCE-om, započinjemo kampanju u Brčkom putem koje će se ljudi informisati o svojim pravima koja proizlaze iz Zakona o povratku napuštene imovine, i načinu ostvarivanja tih prava. Naziv kampanje je "DOSTA JE". Dodatne informacije možete naći u našem saopštenju za javnost.

Prošle sedmice smo u Brčkom održali drugi radni sastanak između zemalja koje se nalaze u dolini rijeke Save. Ovaj put, sastanku su prisustvovali predstavnici Slovenije, kao i Bosne i Hercegovine, Hrvatske i Jugoslavije. Ministarstvo za civilne poslove i komunikacije Bosne i Hercegovine koordinira prijedloge svake zemlje o praktičnim koracima za obnavljanje plovidbe rijekom Savom, i nadamo se da će iste, kao regionalni projekat, finansirati Pakt za stabilnost. Brčko ima odličnu luku za transfer tereta riječnim, željezničkim i drumskim saobraćajem. Obnavljanjem plovidbe rijekom Savom, možemo smanjiti troškove transporta za ovaj unutrašnji region. To može pomoći stvaranju konkurentnije industrije u Bosni i otvaranju novih radnih mjesta.